

Marionna Berther-Schmid, Camischolas



Per l'emprema gada egl onn 1993 tucca il zenn da miert giud clutger da s.Vigeli. Ils 9 da fevrer annunzia el a nus la mort da nossa convischina sesenta ella casa da vegls Marionna Berther-Schmid da Camischolas. La Marionna ei naschida ils 16 da december 1914 ella ucliva da Zarcuns, aschidadir amiez la biala Val Tujetsch. Ses geniturs ein stai Sep Antoni Schmid e Mariuschla, naschida Monn. Segiramein ha ella passentau ina biala affonza el ravugl da nov fargliuns, sis buobs e treis buobas. Sco buna scolarha ella frequentau las scolas da vischnaunca. Aschia eisi stau lev per ella da far igl emprendissadi da cusunza tier sia vischina Barla Capeder.

Igl onn 1938 pils 10 da november sa ella festivar nozzas cul giuven Alfons Berther da Camischolas. En casa a Camischolas dat ei spertamein veta. Quater buobas e dus buobs occupeschan la mumma dall'alva tochen la sera tard. Ella ei ina femna ruasseivla, pazienta e da bien cor; plinavon eis ella aviarta per caussas novas e buca usitadas. Sper il cuser il resti da famiglia surpren ella era laver da cuntschar e cuser d'autras famiglias. Aschia segida ella tonscuso pusseivel cun siu consort Alfons.

Mintga veta vegn accumpagnada da sulegl ed umbriva. Era la Marionna ha sentiu quei. Igl onn 1885 miera il mariu Alfons. In onn suenter serenda la Marionna en casa da vegls s.Vigeli a Sedrun. Las combas fan ad ella quitaus e breigias. Aschia eis ella leda dalla buna tgira e quita en casa s.Vigeli. Maldispostadads sforzan ella da serender il davos temps pli ditg e savens el spital. Ella ei morta ils 9 da fevrer el spital. Il Segner ha clamau a casa sia fideivla survienta Marionna. El regali ad ella la pasch beada.